

La vögla da vaccinar crescha darcheu

In tuot 123 persunas han tut part ultimaing al davomezdi da vaccinaziun sainza termin a Scuol, organisà dal Center da sandà Engiadina Bassa. Fin hoz sun gnüdas dattas 6421 dosas vaccins a l'Ospidal Engiadina Bassa a Scuol.

NICOLO BASS

Fin la fin d'eivna passada sun gnüdas dovradas 6421 dosas da vaccin i'l center da vaccinaziun a l'Ospidal Engiadina Bassa a Scuol. Quai infuormescha Corina Bonifazi dal Center da sandà Engiadina Bassa sün dumonda. Ella es respunsabla pel center da test e da vaccinaziun a Scuol. Sco ch'ella disch, es la dumonda per prümas vaccinaziuns ida inavo las ultimas eivnas. «Nus vain gnü las ultimas eivnas be var 20 fin 30 prümas vaccinaziuns l'eivna, adonta cha vain üna capacità da 650 vaccinaziuns l'eivna i'l center da vaccinaziun da l'Ospidal a Scuol», quint'la. Ella suottastricha però, cha quai sajan unicamaing las cifras dal center da vaccinaziun e ch'ella nu cugnuoscha las cifras da vaccinaziun pro'ls meidis da chasa. Cha l'interess per vaccinar saja però darcheu creschü, quint'la. Uschè han nempe tut part 123 persunas al davomezdi da vaccinar sainza termin chi'd es gnü manà tras in sonda avant ün'eivna. Causa il success da quista vaccinaziun sainza termin, voutan ils respunsabels

repetter la sporta regularmaing. Cha'l termin gnia comunicà sülla pagina d'internet dal Center da sandà Engiadina Bassa.

La sfida da dovrar tuot ils vaccins

Sco cha Corina Bonifazi quinta, es la gronda sfida pel mumaint da postar tants vaccins, sco chi sun interessants per laschar vaccinar. Cha üna jada cha la squita cul vaccin saja pronta, stopcha quella gnir dovrada infra duos uras. «Scha qualchün nu seguiva al termin, vaina tscherchè e telefonà intuorn, fin cha vain pudü dovrar il vaccin per oters interessants», quinta Bonifazi ed agiundscha, «uschè vaina stuvü büttar fin hoz be ün unic vaccin.» Cha quai saja tuot üna prestaziun dal team, declera la manadra dal center da test e vaccinaziun da l'Ospidal a Scuol. Cha eir organisar ün davomezdi da vaccinaziun sainza termin, detta finalmaing gronda lavur. «Quai demuossa üna jada implü la motivaziun e buna voluntà flexibla dals collavuratuors e voluntaris», disch Bonifazi ingrazchond.

Infuormar, sensibilisar, vaccinar

Actual es eir il bus da vaccinaziun dal Grischun in viadi tras l'Engiadina Bassa e Val Müstair. «Quai es üna fich buna sporta per vaccinar a persunas spontanias, ma impustüt eir üna fich buna sporta per infuormar e sensibilisar », disch Corina Bonifazi.

Tenor ella sun las infuormaziuns e sensibilisaziuns fich importantas per l'andamaint da la vaccinaziun. «I'l center da test e vaccinaziun a Scuol as poja eir simplamaing laschar cusgliar, sainza stuvair decider subit schi's vout laschar vaccinar», quint'la ed agiundscha, cha eir il meidi da chasa saja ün'adressa fich importante per la cussagliaziun. «Uschè provaina cun infuormar e sensibilisar da tour la temma e da motivar per exaimpel eir la giuventüna da's laschar vaccinar.»

www.cseb.ch



Il Center da sandà Engiadina Bassa organischescha inscuters da vaccinaziun sainza termin. fotografia: Jon Duschletta